

# L'economia pretenda ina soluziun cun l'UE – senza retard

Retschertga represchentativa da gfs

DA LUCAS DEPLAZES / ANR

■ **L'economia svizra vul ina cunvegna da basa cun l'Uniun europeica (UE). Quei demussa ina retschertga da gfs, Berna.** 67 procent da las interpresas svizras sustegnan ina cunvegna da basa cun l'UE e vulan in agir pli activ da la politica. 20 procent èn cunter.

Las relaziuns da la Svizra cun l'UE pretendan adattaziuns da las cunvegns bilaterals al svilup economic e politic a Brüssel. Il concept sin maisa na cuntenta betg, dat si legns, maina a discussiuns divergentas senza fin. Ils lavurers han tema che lur pajas na sajan betg garantidas cun l'accord en discussiun. Exponents dal nov elegì parlament a Brüssel fan attent che novas tractativas na vegnian betg en dumonda. Sco quai para tira en l'UE en l'avegnir in vent pli criv envers la Svizra. Questa situaziun malguessa fa quitads a l'economia. Ella ha vulì enconuscher ils parairis dals direct-pertutgads.

## Temp d'agir

Per *Monika Rühl*, la manadra da fatschenta d'Economiesuisse, munta il resultat da la retschertga ina clera incarica. Ina cunvegna da basa cun l'UE è en l'interess vital da l'economia svizra, ha punctuà Rühl. Per quest motiv sustegnan l'organisasiun tetgala da l'economia e –l'Alliance-economie politique (EP) in agir a moda pli speditiva dal cussegl federal per arrivar ad in accord instituziunal cun l'UE. Rühl ha accentuà ch'il status quo na saja nagina soluziun. L'economia dovria ina situaziun clera e segira per pudair far las investiziuns necessarias e per garantir vinavant in liber com-



Monika Rühl dad Economiesuisse.

MAD

merzi cun il pli impurtant martgà da la Svizra. La cunvegna da basa garanteschia er las pajas svizras. Pertutgadas fissan tut las branschas economicas. Rühl ha plinavant fatg attent a diversas mesiras negativas che l'UE pudess decretar envers la Svizra, sco participaziun als programs da perscrutaziun, restricziuns per l'access a la fiera da finanzas. Ina decisiun davart da la politica saja uss urgenta. Quai fiss vairamain fatal da vulair spetgar giu la decisiun dal pievel da-

vart l'iniziativa da migraziun da la pps, prevista per l'onn proxim, ha fatg attent la manadra da gestiun.

## Suprema prioritad

En vista a l'intschertezza politica davart las relaziuns futuras cun l'UE han Economiesuisse ed Alliance-economie politique incaricà gfs.bern d'eruir la posiziun da l'economia svizra en connex cun l'actuala discussiun davart las relaziuns cun

l'UE. Tranter ils 25 d'avrigl ed ils 13 da matg 2019 ha gfs.bern consultà passa 1000 interpresas cun almain 20 collavuratur e collavuraturas. Il resultat è cler. Per l'economia svizra ha la cunvegna da basa suprema prioritad. Dus terz da las interpresas recumondan ina cunvegna da basa uschè spert sco pussaivel. Per var 20 procent n'è la fatschenta main impurtanta, quatter procent vesan l'accord plitost sco dischavantag.